

28/06/2004

Cuti Dr Zainul 1,333 hari luput

PUTRAJAYA: Sepanjang 35 tahun dalam perkhidmatan awam, Tan Sri Dr Zainul Ariff Hussain jarang sekali mengambil cuti. Malah beliau mungkin memegang rekod sebagai kakitangan awam yang paling banyak cutinya luput begitu saja.

Apabila bersara wajib pada usia 55 tahun, tiga tahun lalu sebelum perkhidmatannya disambung secara kontrak, beliau mempunyai 1,333 hari atau tiga tahun setengah, cuti yang tidak diambil.

Mengikut peraturan asal perkhidmatan awam, cuti yang tidak diambil boleh terkumpul setakat 90 hari saja tetapi ini telah ditambah kepada 120 hari mulai tahun ini. Ini bermakna, cuti selebihnya yang tidak diambil adalah luput.

Kenapakah Dr Zainul Ariff tidak suka pergi bercuti?

"Satu tuah bagi saya sihat walafiat, Alhamdulillah. Kita menjaga kesihatan dan tidak ada sebab nak bercuti apabila kerja banyak lagi. Saya suka bekerja dan saya anggap kerja itu sebagai satu keseronokan," katanya.

Beliau berkata demikian dalam temubual di pejabatnya di sini sebelum menamatkan kontrak tiga tahunnya pada Selasa lalu dalam jawatan terakhirnya sebagai Ketua Pengarah Unit Penyelarasan Pelaksanaan (ICU) Jabatan Perdana Menteri.

Sepanjang perkhidmatan tiga tahun yang disambung itu, beliau juga tidak mengambil cuti 90 hari yang layak baginya kerana "banyak lagi yang kita nak laksanakan untuk memajukan negara ini".

Sambil memetik kata-kata bekas Perdana Menteri, Tun Dr Mahathir Mohamad mengenai "Perjuangan Belum Selesai", Dr Zainul Ariff berkata: "Kalau kita seronok buat kerja, timbul kepuasan dalam kerja kita."

Satu lagi keistimewaan perwatakan Dr Zainul Ariff ialah menghantar kad hari jadi kepada semua 900 kakitangan ICU di seluruh negara, satu amalan yang disifatkannya sebagai cara tersendiri bagi memupuk semangat berpasukan di kalangan kakitangannya.

"Kita nak bekerja bersama maka tanggungjawab untuk menjaga hati, jaga hubungan rapat, team work dalam satu pasukan perlu ada, jadi satu caranya saya menganggap hari jadi tu... jadi satu perkara yang cukup sensitif pada individu," katanya.

"Setiap kakitangan dalam ICU menerima kad daripada saya pada hari jadinya, tak kira dia berkhidmat di Sabah ke atau di Sarawak, Kelantan, Terengganu, mana-mana pelusuk pun dapat kad hari jadi. Alhamdulillah sudah lima tahun saya amalkan ini... lebih 900 kad saya hantar setahun," katanya.

Ada kalanya beliau menelefon terus kakitangannya yang menyambut hari jadi dan menyanyi lagu selamat hari jadi kepada mereka menerusi telefon.

"Bila mendapat panggilan begini dari Ketua Pengarah, ini satu rangsangan pada diri dia sendiri," katanya.

Sepanjang enam tahun sebagai Ketua Pengarah ICU, satu daripada jawatan paling kanan dalam perkhidmatan awam, Dr Zainul Ariff mewujudkan satu etika kerja yang mengandungi 12 perkara, di samping mewajibkan kakitangan mengambil peperiksaan kemahiran komputer dan secara konsisten menggalakkan mereka menguasai bahasa Inggeris.

Apakah rancangan Dr Zainul Ariff, yang telah berkhidmat di bawah kelima-lima Perdana Menteri Malaysia, selepas bersara?

Beliau berkata Perdana Menteri, Datuk Seri Abdullah Ahmad Badawi juga bertanya kepadanya soalan yang sama.

"Perdana Menteri juga tanya saya... you nak berhenti ni apa you nak?

"Saya kata tak ada nak apa... dapat berkhidmat kepada PM (Perdana Menteri) adalah satu penghormatan, mendapat kepercayaan PM dan berjaya menjalankan tugas itu adalah satu kehormatan dan itu juga satu rahmat.

"Bukan semua orang dapat menjalankan tugas dan bekerja bersama PM, kita diberi kedudukan, amanah adalah satu amanah yang cukup berat... dan selepas ini legalah sedikit, tidak lagi ada tanggungjawab itu," katanya.

(END)